

ს ა ქ ა რ თ ვ ე ლ ო
ქალაქ ფოთის მუნიციპალიტეტის საკრებულო
იურიდიულ, სამანდატო, საპროცედურო საკითხთა და ეთიკის კომისია

ოქმი N10

„3“ სექტემბერი 2020 წელი.

სხდომას თავმჯდომარეობდა კომისიის თავმჯდომარე: ხვიჩა ცხვიტარია.

სხდომას ესწრებოდნენ: კომისიის წევრები-დავით კვიციანი, ოლეგი ნაჭყებია, თამარ თოფურია.

სხდომას კომუნიკაციის ელექტრონული საშუალებით (Viber) ესწრებოდა „საერთაშორისო გამჭვირვალობა -საქართველოს“ ზუგდიდის რეგიონული წარმომადგენლობის კოორდინატორი არჩილ თოდუა.

მოისმინეს: ინფორმაცია, ქალაქ ფოთის მუნიციპალიტეტის საკრებულოს იურიდიულ, სამანდატო, საპროცედურო საკითხთა და ეთიკის კომისიის სხდომის დღის წესრიგის შესახებ.

დღის წესრიგი:

1. „საერთაშორისო გამჭვირვალობა -საქართველოს“ ზუგდიდის რეგიონული წარმომადგენლობის 2020 წლის 1 სექტემბრის N09/ზ-317 წერილის თაობაზე.

/მომხს: ხვიჩა ცხვიტარია - იურიდიულ, სამანდატო, საპროცედურო საკითხთა და ეთიკის კომისიის თავმჯდომარე/

აზრი გამოთქვეს კომისიის წევრებმა: დავით კვიციანმა, ოლეგი ნაჭყებიამ, თამარ თოფურიამ.

დაადგინეს: დამტკიცდეს იურიდიულ, სამანდატო, საპროცედურო საკითხთა და ეთიკის კომისიის სხდომის დღის წესრიგი წარმოდგენილი სახით.

კენჭისყრის შედეგები:

მომხრე -----4

წინააღმდეგი ----- 0

მოისმინეს:

ინფორმაცია, „საერთაშორისო გამჭვირვალობა -საქართველოს“ ზუგდიდის რეგიონული წარმომადგენლობის 2020 წლის 1 სექტემბრის N09/ზ-317 წერილის (შემგომში -წერილი) თაობაზე.

/მომხს: ხვიჩა ცხვიტარია - იურიდიულ, სამანდატო, საპროცედურო საკითხთა და ეთიკის კომისიის თავმჯდომარე/

წერილის თანახმად, ქალაქ ფოთის მუნიციპალიტეტის საკრებულოში პეტიციის წარდგენის უფლება უნდა მიენიჭოს მუნიციპალიტეტის ტერიტორიაზე რეგისტრირებულ ამომრჩეველთა 1% -ზე ნაკლებ რაოდენობას (0,5%) და შესაბამისი ცვლილებები უნდა შევიდეს ქალაქ ფოთის მუნიციპალიტეტის საკრებულოს რეგლამენტში (დეტალური ინფორმაციისთვის იხილეთ წერილი).

აზრი გამოთქვას კომისიის წევრებმა: ხვიჩა ცხვიტარიამ, დავით კვიციანმა, ოლეგი ნაჭყებამ, თამარ თოფურიამ, „საერთაშორისო გამჭვირვალობა -საქართველოს“ ზუგდიდის რეგიონული წარმომადგენლობის კოორდინატორმა არჩილ თოდუამ, რომელმაც ხაზი გაუსვა საკითხის აქტუალობას და მნიშვნელობას და ითხოვა ინიციატივის მხარდაჭერა.

დაადგინეს:

1. კომისიას მიზანშეწონილად არ მიაჩნია ქალაქ ფოთის მუნიციპალიტეტის საკრებულოში პეტიციის წარდგენის უფლება მიენიჭოს მუნიციპალიტეტის ტერიტორიაზე რეგისტრირებულ ამომრჩეველთა 1% -ზე ნაკლებ რაოდენობას (0,5%), შემდეგ გარემოებათა გამო:

ქალაქ ფოთის მუნიციპალიტეტი არის მჭიდროდ დასახლებული ქალაქი და მოსახლეობის 1%-ის ხელმოწერის შეგროვება პრობლემას არ წარმოადგენს, აქვე აღსანიშნავია, რომ პეტიციის წარდგენის პროცესში მიზანშეწონილია ჩართული იქნეს მოსახლეობის ფართო ფენა, რათა უფრო ეფექტურად განისაზღვროს მოსახლეობის ნება ამა თუ, იმ საკითხთან დაკავშირებით. ზემოხსენებულ საკითხს არეგულირებს საქართველოს ორგანული კანონის „ადგილობრივი თვითმმართველობის კოდექსის“ 85-ე მუხლის მე-4 პუნქტის „ბ“ ქვეპუნქტი, რომლითაც ადგილობრივი თვითმმართველობის განხორციელებაში მოქალაქეთა მონაწილეობის ერთერთი ფორმაა პეტიცია. რაც უფრო მეტი მოქალაქე მონაწილეობს პეტიციის წარდგენაში მით უფრო მეტი ადამიანია ჩართული ადგილობრივი თვითმმართველობის განხორციელებაში და პრობლემის (საკითხის) გადაწყვეტაში. ამასთანავე, არ არის მტკიცებულება და ვერ დგინდება ის გარემოება, რომ ქალაქ ფოთის მუნიციპალიტეტის საკრებულოში შემოსულ პეტიციათა სიმცირე გამოწვეულია, რეგულაციით, რომლითაც პეტიციის წარდგენის უფლება აქვს მუნიციპალიტეტის ტერიტორიაზე რეგისტრირებულ ამომრჩეველთა არანაკლებ 1%-ს.

აღსანიშნავია, რომ საქართველოს ორგანული კანონის „ადგილობრივი თვითმმართველობის კოდექსის“ 86-ე მუხლის 24-ე პუნქტის, „ქალაქ ფოთის მუნიციპალიტეტის საკრებულოს რეგლამენტის დამტკიცების შესახებ“ ქალაქ ფოთის მუნიციპალიტეტის საკრებულოს 2014 წლის 24 დეკემბრის №21/56 დადგენილებით დამტკიცებული რეგლამენტის 119-ე მუხლის შესაბამისად, ქალაქ ფოთის მუნიციპალიტეტში მცხოვრებ პირებს მარტივად, ყოველგვარი შეზღუდვის გარეშე შეუძლიათ წარადგინონ პეტიცია ელექტრონული ფორმით ვებგვერდების <http://poti.gov.ge/> და <http://petition.lsg.ge/poti/> მეშვეობით.

2. კომისიის გადაწყვეტილების შესახებ ეცნობოს „საერთაშორისო გამჭვირვალობა -საქართველოს“ ზუგდიდის რეგიონულ წარმომადგენლობას.

მომხრე ----- 4

წინააღმდეგი ----- 0.

იურიდიულ, სამანდატო, საპროცედურო საკითხთა

და ეთიკის კომისიის თავმჯდომარე

ხვიჩა ცხვიტარია



09/ზ-317

01 სექტემბერი, 2020 წ.

ქალაქ ფოთის მუნიციპალიტეტის საკრებულოს თავმჯდომარეს,
ბატონ ბექა ვაჭარაძეს

ბატონო ბექა,

როგორც მოგეხსენებათ „საერთაშორისო გამჭვირვალობა-საქართველო“ მიმდინარე წლის 4 აგვისტოს გამოაქვეყნა ანგარიში „ფოთის საკრებულოს საქმიანობის შეფასება“. ანგარიშში წარდმოგენილ რეკომენდაციათა შორის ერთ-ერთი შეეხებოდა პეტიციაზე ხელმოწერთა რაოდენობის ქვედა ზღვარად 1% ნაცვლად 0.5 პროცენტის დაწესებას. აღნიშნულ საკითხზე საკრებულოს წევრებთან ერთად ვიმსჯელებთ ფოთში გამართულ დისკუსიაზეც.

კანონმდებლობა თვითმმართველობებს აძლევს შესაძლებლობას პეტიციის საჭირო ხელმოწერთა რაოდენობა შეამცირონ მათთვის სასურველ ნებისმიერ ოდენობამდე. თვითმმართველობის კოდექსი აწესებს მხოლოდ ზედა ზღვარს - 1%, რაც მუნიციპალიტეტებში ამომრჩევლების ოდენობის გათვალისწინებით, შესაძლოა, რთულად შესასრულებელი მოთხოვნა იყოს. რის დასტურადაც შესაძლოა მივიჩნიოთ ის გარემოებაც, რომ ფოთის საკრებულოში 2017 წლის ნოემბრიდან 2019 წლის დეკემბრის ჩათვლით მხოლოდ ოთხი პეტიცია იქნა რეგისტრირებული, ეს მაშინ როდესაც პეტიცია თვითმმართველობის საქმიანობაში მოქალაქეთა ჩართულობის ერთ-ერთი ყველაზე მნიშვნელოვანი ფორმაა.

ზემოთქმულიდან გამომდინარე ვფიქრობთ, რომ ფოთის საკრებულომაც უნდა შეამციროს პეტიციაზე ხელმოწერთა რაოდენობის ქვედა ზღვარი და 1% ნაცვლად დააწესოს 0.5 პროცენტი, რაც გაუადვილებს დაინტერესებულ პირებს პეტიციის მომზადების პროცედურას.

შესაბამისად მოგმართავთ ინიციატივით „ქალაქ ფოთის მუნიციპალიტეტის საკრებულოს რეგლამენტის დამტკიცების შესახებ“ ქალაქ ფოთის მუნიციპალიტეტის საკრებულოს 2014 წლის 24 დეკემბრის N21/56 დადგენილებაში შეტანილ იქნეს შემდეგი ცვლილება:

• 94-ე მუხლის 1 პუნქტი ჩამოყალიბდეს შემდეგი რედაქციით:
წინადადებები და ნორმატიული აქტის პროექტები ჩაითვლება პეტიციის წესით შემოტანილად და საკრებულოს სხდომაზე განიხილება თუ ამ წინადადებას ან ნორმატიული აქტის პროექტს ხელს აწერს თვითმმართველ ერთეულში რეგისტრირებულ ამომრჩეველთა არა ნაკლებ 0.5% და არსებობს საკრებულოს აპარატის დასკვნა ხელმოწერათა ჩატარების კანონიერებისა და ხელმოწერების ნამდვილობის შესახებ.

• 119¹-ე მუხლის „ა“ პუნქტი ჩამოყალიბდეს შემდეგი რედაქციით:
ა) მუნიციპალიტეტის ტერიტორიაზე რეგისტრირებულ ამომრჩეველთა არანაკლებ 0.5%-ს





„საერთაშორისო გამჭვირვალობა-საქართველო“ გამოთქვამს მზადყოფნას ჩაერთოს აღნიშნული ინიციატივის განხილვის პროცესში, განხილვის ნებისმიერ ეტაპზე. შესაბამისად გთხოვთ წინასწარ გვაცნობოთ, თანხმობის შემთხვევაში, როდის გაიმართება წარმოდგენილი ინიციატივის განხილვა.

მადლობას გიხდით თანამშრომლობისთვის.

პატივისცემით,

არჩილ თოდუა



„საერთაშორისო გამჭვირვალობა - საქართველოს“
ზუგდიდის რეგიონული წარმომადგენლობის კოორდინატორი
საქართველო, ქალაქი ზუგდიდი, 2100; კ. გამსახურდიას 67. ტელ.: 593 61 47 11;